



Selasa, 23 Februari 2021

Ogen: Keluaren 32:5-6



"Idol"



Ise nge situhuna Dibatandu? Kata enda sederhana tapi cukup mbages penggejapenna. Bangsa Israel la saber ibas nimai Musa jumpa ras Dibata i Deleng Sinai nari. Isuruh bangsa Israel me, Harun erban sada dibata guna banci isembah. Paksa si e, kerina emas-emas bangsa Israel ipepulung guna erban sada patung lembu emas bagepe ipajekken me sada batar-batar i je. Imomoken Harun me gelah bangsa Israel banci nembah patung lembu emas e ndai guna jadi dibatana. Mehaga kel iakap bangsa Israel, nggo akapna ia me bangsa simbelinna si metunggungna ibas ia banci nembah patung lembu emas e ndai. Bangsa Israel merasa "terkenal/idol i antara bangsa-bangsa sideban", sebab bangsa e lit si sembahna emas. Labo ngenca si e, dung ia ersembah man patung lembu emas e, kerina ia minem-minem, pesta mabuk, ras ngelakoken dahin-dahin si la ngena ate Dibata. Uga kita? enggo nge kita jadi bagin bangsa Israel enda? Ise nge situhuna Dibatandu? Entah perban lit bas kam erta-erta nta pe bagin si mehaga e, nggo e jadi dibatandu? Ula pernah siakap megah banta adi paksa lit bas kita, ula kita nggit jadi terkenal perban ndalanken si la ngena ate Dibata. Dibatanta em Kap Tuhan, labo sideban. Dibatanta labo duit, labo emas, labo pangkat, labo jumandu, labo sekolah anakndu ras sidebanna. Adi la perban perbahanen Dibatanta, labo banci kita ndatken sie kerina. Ingetlah, kita nggeluh mehaga perban Dibatanta e mehaga, kita nggeluh sikap, perban e me sura-sura Dibatanta. Ula siban dibata sideban seakatan Tuhan Dibatanta. Pedah Dibatanta sipemena nina Aku kap Tuhan Dibatandu, ola isembahndu dibata-dibata sideban, tapi sembahlah Aku. Dalankenlah pedah Dibata nta enda. Ise pe kita, adi siban dibatanta selain Bapanta i surga, pasti kegeluhenta pe dem alu kiniseran. Alu la sisedari, megati kita nggo erban dibata sideban bas geluhta gelah kita ipandang mehaga. Ertta-ertta ta siban jadi gegehta guna ndalanken kerna sura-surata amingia megati sura-surata e ndalanken peratenta labo peraten Dibata.